

Izjava OHR-a na konferenciji za medije međunarodnih organizacija u Mostaru

Visoki predstavnik u Washington-u sa zvaničnicima SAD-a o saradnji sa ICTY

Visoki predstavnik, Paddy Ashdown, boravi u Sjedinjenim Američkim Državama gdje održava sastanke s najvišim zvaničnicima administracije SAD-a u Državnom vijeću sigurnosti i State Departmentu. Danas će održati razgovore sa Pierrom Prosperom, ambasadorom Sjedinjenih Država za ratne zločine i imati večeru s predsjednikom Svjetske banke, Jamesom Wolfensohnom. Sutra će se obratiti Vijeću sigurnosti Ujedinjenih naroda, gdje će u okviru redovnog šestomjesečnog izvještaja izložiti najnovije podatke o napretku ostvarenom u BiH. Zatim će održati razgovore sa generalnim sekretarom UN-a, Kofi Ananom i generalnim podsekretarom za mirovne operacije, Jean-Marie Guehennom.

Suština razgovora i u Washingtonu i u New Yorku odnosit će se na trenutni status aktivnosti koje Bosna i Hercegovina poduzima kako bi osigurala prijem u Program *Partnerstvo za mir* i započela pregovore o potpisivanju Sporazuma o stabilizaciji i pridruživanju sa Evropskom unijom. Tokom razgovora će se posebno razgovarati o mjerama za otklanjanje prepreka stvorenih usljed nedostatka saradnje sa ICTY.

Razmotrit će se neposredna opasnost s kojom se BiH suočava zbog nesaradnje RS-a sa ICTY, te da li u narednih nekoliko sedmica vlasti Republike Srpske mogu prevazići tih devet godina nesaradnje.

Prvi zamjenik Visokog predstavnikaprisustvovat će zvaničnom

otvaranju tržnice Arizona

Prvi zamjenik Visokog predstavnika, Donald Hays, i supervizor za Brčko, Susan Johnson, prisustvovat će u četvrtak zvaničnom otvaranju tržnice Arizona u Brčko Distriktu. Svečanost otvaranja počet će u 13:00 sati.

Obnova tržnice Arizona – u okviru koje se trgovanje reguliše bez sputavanja poduzetničkih mehanizama koji od ove tržnice čine najveću i najuspješniju u regiji – nudi model za BiH ekonomiju u cjelini.

Kako će istaknuti ambasador Hays: ‘ U godinama koje dolaze, Arizona tržnica bit će dragocjen ekonomski resurs za Brčko i za BiH u cjelini, jer je uspostavljena na zdravim zakonskim i komercijalnim osnovama. Regulatori i poslovni ljudi ostvarili su plodonosnu saradnju kako bi osigurali ekonomsku održivost projekta, sigurnost za potrošače, te upravljački ambijent u kojem će se raditi u korist poštenih trgovaca. Željeli bismo da se ovaj model primjenjuje i u ostatku zemlje.